



ISLAMSKA ZAJEDNICA U BOSNI I HERCEGOVINI

Medžlis Islamske zajednice Tešanj

Izvršni odbor

GODINA XII
Broj: 1/46

BILTEN

Januar-mart 2017.g.
r-ahir - dž.-l-uhra 1438.h.g.

Interno informativno glasilo Medžlisa IZ-e Tešanj

TEMA BROJA: Nastavak projekta „Dodatnog institucionalnog odgoja i edukacije“ str. 4. i 5.



Tribina: „Muslimanska porodica, prava i dužnosti“
mr. Nusret Abdibegović, dr. Safija Malkić i dr. Aid Smajić, atrij Medžlisa – 29.03.2017.g.



Održano takmičenje najboljih učača Kur'ana napamet
uz bogate nagrade (4 umre i 8.000,00 KM).
Finalno takmičenje održano – 14.01.2017.g.

**ODRŽANA 4. SJEDNICA SKUPŠTINE
MEDŽLISA IZ-e TEŠANJ u V sazivu - 26.02.2017.**

**POČELA SA RADOM PREDŠKOLSKA USTANOVA
DJEČIJE OBDANIŠTE (vrtić i jaslice) „REVDA“**



Na kojoj je usvojen Izvještaj o radu IO Medžlisa IZ-e Tešanj za 2016. g. sa Općim smjernicama za rad u 2017. i data saglasnost na Završni račun za 2016. godinu i Budžet za 2017. g., te uručene pohvale zaslužnim.



Nakon svečanog otvorenja, pribavljanja potrebne dokumentacije i registracije od 02.01.2017. godine počela sa radom predškolska ustanova dječije obdanište „Revda“ (vrtić i jaslice) u suterenu Kutahya (Plave) džamije.

NAJAVLJUJEMO

- 15. 04. 2017. - Šije - Mevlud u mesdžidu Bajrići, u povodu završetka rekonstrukcije mesdžida - akšam-namaz.
- 21. 04. 2017. - Hamzibegova džamija - Kamen temeljac za izgradnju mokrog čvora i uređenje harema, u 12,00 sati.
- 23. 04. 2017. - Dibekhana džamija – Mevlud i uručenje vakufnima vakifima, poslije akšam-namaza.
- 30. 04. 2017. - Mrkotić-Putešić - Tradicionalni Mevlud za šehide u džamiji, poslije akšam-namaza.
- 03. 05. 2017. - Oraš Planje - Mevlud u povodu općinskog Dana šehida u Plavoj džamiji, poslije akšam-namaza.
- 05. 05. 2017. - Čarši-džamija - Svečano otvorenje abdesthane u haremu džamije, u 12,00 sati. (Prije džume).
- 07. 05. 2017. - Miljanovci Novi - Tradicionalna „Večer Kur'ana“ u džamiji, poslije akšam-namaza.
- 14. 05. 2017. - Bukva - Stavljanje u funkciju (proklanjanje) novoizgrađene džamije, poslije podne-namaza.
- 21. 05. 2017. - Lepenica – tradicionalni mevlud u mesdžidu Bedaci, poslije podne-namaza.
- 25. 05. 2017. - Jelah – večer ilahija – „U susret ramazanu“ sa Arminom Muzaferijom, poslije akšam-namaza.

27. 05. 2017.– 01. 09. 1438. h. g. – Prvi dan ramazana - prvi dan posta.

RIJEČ UREDNIKA**Iz obraćanja na sjednici Skupštine Medžlisa****Esselamu alejkum!**

Pred vama je radni materijal u formi godišnjeg izvještaja o radu Medžlisa IZ-e Tešanj. (...) Izvještaj možemo podijeliti na tri tematske cjeline ili na tri polja koja se tiču naše vjere, našeg obrazovanja i odgoja te naše brige o ljudima, imovini kroz institucionalnu organizaciju naše Islamske zajednice.

Kada je u pitanju vjera, moto našeg rada i izvještaja su riječi Božijeg poslanika Muhammada s.a.v.s. u kojima se kaže: "Vjera se sastoji od sedamdeset i nekoliko, odnosno šesdeset i nekoliko ogranaka. Najbolji je izgovaranje riječi La ilahe illallah. Najmanji je uklanjanje onoga što smeta s puta. Stid je jedan dio vjere." (Muslim).

Dakle u tom širokom rasponu vjere, aktuelizirana su pitanja iz domena ibadeta (post, zekat, kurban, hadž, 12.rebiul-evvel, hidžra, namaz, džamija...).

Izvještaj pred vama pokazuje da lična vrijednost vjere može postati i kolektivna, kao što je na području Medžlisa Tešanj. Zbog toga Medžlis islamske zajednice Tešanj zauzima značajno mjesto ne samo na području zeničkog muftiluka, nego i Islamske zajednice Bosne i Hercegovine.

Druga tematska cjelina jeste pitanje obrazovanja i odgoja. Ova cjelina se obrađuje u ovom izvještaju kroz (mekteb, vjeronauka u školi, predškolsko obrazovanje, tribine mevlude...)

Na ovom planu moramo biti svjesni izgradnje sistema obrazovanja i odgoja u kojem će podjednako biti važni kvalitet ali i kvantitet u kome će mektebe, škole, obdaništa, tribine, mevludi pratiti životna praksa.

Sa radošću danas mogu kazati da smo i na ovom planu postigli značajne rezultate u godini iza nas. Posebno želim naglasiti otvaranje prve predškolske ustanove, obdaništa Revde, unutar Islamske zajednice.

Danas kao inicijativu u svom ekspezu podnosim ovoj časnoj skupštini potrebu za reaktiviranje Gazi Ferhad-begove medrese čija su vrata bila otvorena sve do 1946. godine, odnosno 70 godina zatvorena. (...).

Treća tematska cjelina jesu pitanja koja tretiraju našu brigu o ljudima i imovini kroz institucionalno organizovanje i jačanje Islamske zajednice. Poznato nam je da sve što se događa, događa se prema Božijoj volji i određenju. Povijesno gledano ljudski faktor je važan ali trajnost događaja, ljudi i imovine daje institucija kao dobro uređena organizacija.

Medžlis islamske zajednice Tešanj napravio je značajne pomake u organizaciji administracije, finansijskog poslovanja, vjerskoprosvjernog angažmana, stavljajući sve te vrijednosti u okvir institucionalnog razumjevanja Islama kroz organe Islamske zajednice. (...)

Aktivnosti IO Medžlisa IZ-e :

17. 02. 2017. g. Održana 20. redovna sjednica u prostorijama Medžlisa IZ-e Tešanj.

Sjednicom je predsjedavao, po ovlaštenju predsjednika IO, glavni imam, a prisustvovalo 11. članova. Razmatran dnevni red od 10 tačaka, a usvojeni su: Izvod iz zapisnika sa 19. redovne sjednice, Izvještaj o realizaciji Programa obilježavanja 12. rebiu-l-evvevla 1438.h.g., Zaključak Komisije o izvršenom popisu, Izvještaj o radu IO za 2016. godinu sa općim smjernicama za rad IO u 2017. godini, Završni račun Medžlisa za 2016. godinu i prijedlog Budžeta za 2017. godinu, Odluka o dodjeli pohvala za 2016. godinu, i dr.



30. 03. 2017. g. Održana 21. redovna sjednica u prostorijama Medžlisa IZ-e Tešanj.

Sjednicom je predsjedavao predsjednik Zehrudin Kruško, a prisustvovalo 12 članova. Razmatran je dnevni red od 9 tačaka, a usvojeni su: Izvod iz zapisnika sa 20. redovne sjednice, informacija o održanoj 4. sjednici Skupštine Medžlisa IZ-e Tešanj, Plan aktivnosti za takmičenje učenika osnovnih i srednjih škola iz vjeronauke, Plan aktivnosti za takmičenje i završne ispite polaznika mektepske nastave, Plan aktivnosti za obilježavanje 7. maja Dana džamija, Prijedlozi komisije za vakuf i vakufsko zemljište, Odluka o prijemu u stalni radni odnos pravnik Kasima Halilovića, Informacija o radu dječijeg obdaništa « Revda ».

**POZIV NA SARADNJU**

Esselamu alejkum, poštovani čitatelji!

Pred vama je novi broj Biltena Medžlisa IZ-e Tešanj. Ovo je još jedan naš pokušaj da damo skroman doprinos u prezentaciji našeg rada i aktivnosti i da ga približimo vama.

Javite nam se sa vašim primjedbama i sugestijama kako bismo zajednički što bolje prezentovali naš Medžlis.

Posjetite našu web stranicu i dostavite vaše ideje na naš e-mail

naša web stranica: www.miztesanj.ba

e-mail: iztesanj@bih.net.ba

Bilten Medžlisa IZ-e Tešanj

Izdavač: Medžlis IZ-e Tešanj, za izdavača predsjednik IO Zehrudin Kruško.

Glavni i odgovorni urednik: mr. Fuad ef. Omerbašić, tekst i foto Rašid Orlović.

Redakcija: Dževad ef. Hasanbašić, mr. Enver ef. Kurtić, hafiz mr. Almir ef. Hadžić i Suljo ef. Djedović prof. Saradnici imami MIZ-e Tešanj.

Hutba reisu-l-leme IZ-e u BIH dr. Husein ef. Kavazovića od 17.03.2017. , (uz akciju „Eco proljeće 2017.“.g) .

U ime Allaha, Milostivog, Samilosnog. Milostivom Allahu zahvaljujemo se. Životu koji daje radujemo se.

Ljepoti Njegova stvaranja divimo se. Poslanika Njegovog Muhammeda, a.s., sjećajmo se i salavatima molimo za njegovu zauzimanje na Danu kada nam ono bude dragocjeno.

Milosti Allahovoj nadajmo se. Allahov ajet iz sure El-En'am doziva nas:

Allah je Onaj Koji daje da zrno i košpica raspuknu (radi klijanja). On izvodi živo iz mrtvog i mrtvo iz živog. To vam je Allah. Pa kuda se vi okrećete (od Njega)? On je Tvorac danjeg svjetla. I učinio je noć radi odmora, a sunce i mjesec radi računanja vremena. To je odredba Moćnog i Sveznajućega (Boga).

U ovih nekoliko riječi opisan je čin kojem ćemo svjedočiti u mjesecima koji su ispred nas. Proljeće će oživjeti u žuboru vode i mirisu zemlje i bilja. Mi vjerujemo da istinska i prava promjena dolazi od Stvoritelja, Koji u svakom času stvara iz mrtvog živo, a živo prevodi u mrtvo u mijenama i ciklusima koji ne zastaju.

U našim krajevima proljeće je najbolje vrijeme da uočimo Allahovu moć da o njoj razmišljamo i da joj se divimo, neizmerno zahvalni što nas je učinio svjedocima neponovljive ljepote stvaranja.

Svako od nas ima priliku svjedočiti tom iznimnom procesu i nimet tog čina trebalo bi iskoristiti. To stvaranje iako je ciklično nikada nije isto; uvijek je različito, a slično.

U mjesecima koji su pred nama svako od nas imaće priliku svjedočiti novom životu prirode, podmlađivanju zemlje, zalijevanju ove naše prostrane i svima nama dovoljne bašče kišom iz oblaka koji podsjećaju na kakva dobra i brižna baštovana. Uživat ćemo nakratko u mirisu behara, a onda se radovati zametku i rastu plodova. Za one koji su posebno obdareni Allah daje priliku da ljepotu osjete i u Njegovim riječima koje na poseban način bude čula, maštu i razmišljanje. U 99. ajetu sure El-En'am Milostivi obznanjuje:

I On je Onaj koji je spustio vodu s neba. Pa smo Mi njome dali da raste svaka biljka i iz njih izveli zelenilo iz koga izvodimo zrnje u klasovima. A od palme njene čahure, grozdove lahko dohvatljive, i Mi (izvodimo) vrtove s groždem, hurme i šipke koje je slično, a raznovrsno. Pogledajte plodove (svakog od toga) kada cvate i gledajte zrijenje svakog od njih. Zaista u tome vi imate znakove za ljude koji vjeruju.

Na sličan način Allah nudi i drugu sliku u 98. ajetu (sure El-En'am,) za one koji znakove znaju čitati i razumijevati: stvaranje Adema i njegovo stalno bivanje i počinak na Zemlji, do roka određenog, koga samo Allah Uzvišeni zna.

On je Onaj Koji vas je stvorio od jednog čovjeka (Adema), pa (vam je dao) smještaj (u majčinoj utrobi i na zemlji) i mjesto gdje ćete biti sahranjeni. Mi smo objasnili znakove narodu koji razmišlja.

Ovim trima primjerima, skladnim kur'anskim slikama, možemo svjedočiti svaki puta kada u svoje ruke uzmemo Kur'an Plemeniti i u smjernoj pobožnosti učimo sure i ajete ove Mudre Knjige (u suri El-En'am). Te slike se mogu posmatrati i dok se šeta ili sjedi. Za ove znakove, pored očiju, čula sluha i mirisa, potrebno je i srce, jer, kao što Kur'an kaže, nisu slijepi oči, slijepa su srca u prsima. Vjeri je potreban srčani, a ne očni vid. Na kraju Milostivi, u ajetima 102 - 104 sure El-En'am, daje Svoje objašnjenje, ukazujući na Onoga koji stoji iza perde i vela:

To vam je Allah, Vaš Gospodar, Nema Boga osim Njega, Stvoritelja svake stvari, pa Ga obožavajte! On nadzire svaku stvar (sve). Ne mogu Ga sagledati oči, a On obuhvaća (ljudske) poglede. On zna (tajne stvari) i zna (sve). Već su vam došli od vašeg Gospodara vidljivi dokazi pa tko vidi sebi koristi. A tko je slijep taj sebi štetu nanosi.

U ovo doba godine mnogi naši sugrađani svojim vrijednim rukama podižu voćnjake, obrađuju polja i livade. Na tim njihovim imanjima znaci su (djela i) Gospodar svjetova, koji neprestano daje da bašča omeće, cvate i zrije. Njegova bašča je cijeli svemir, a On se u svakom trenu nahodi u svemu, stvara i priprema iz mrtvog živo i iz živog mrtvo.

Svemir se održava u neprestanom kretanju i novom stvaranju. **Svakog trenu on stvara; Stvara šta hoće**, kaže Kur'an. A i čovjek je dio svemira, stvoren da se kreće i radi. Dok se kreće, on živi, dok radi, pronalazi smisao svog postojanja. Kada to prestanemo činiti, vrijeme je da se selimo s ovog svijeta. To je sunetullah, Božiji zakon na zemlji.

Poslanik, a.s., učio nas je da rad oslobađa ljude od ovisnosti o drugima i poniženja pred drugim ljudima. Ovu životnu filozofiju on je sazeo riječima da siromaštvo, koje je rezultat ljenosti, najviše nalikuje na nevjeru (kufr). Zamalo da siromaštvo postane nevjera, kaže on. Zato apeliram na sve kojima je data blagodat posjedovanja zemlje da nipošto ne negiraju ovu Božiju blagodat. Štaviše, njenom obradom pokazimo zahvalnost Stvoritelju na blagodatima koje nam je dao.

One koje je Allah iskušao da posluju i o radnicima brinu želim posebno podsjetiti na obaveze prema njima. Radnik je Božiji emanet u rukama poslodavca. To je velika kušnja i odgovornost iz koje se može izroditi i veliki grijeh i veliki sevap. Ali, i pravedan i pošten poslodavac je velika kušnja za radnika da svoj posao obavi stručno i marljivo. Poslanik je kazao: *Isplatiite radniku zaradu prije nego mu se znoj osuši, a upoznajte ga s njenom veličinom prije početku posla.* (El-Bejheki)

U ovim danima u kojima svjedočimo Božiji sklad u prirodi, među nama čujemo dosta oštrih riječi. Čini mi se da, s povratkom proljeća, izdijelja i ta vrsta korova, koja nam zamućuje bistru vodu naše svakodnevnice i teške borbe. U vrijeme buđenja života, eto, budi se i to nasrtanje. Iza nas su dani s velikim očekivanjima i nadanjima. Naše žrtve jesu velike, ali je i naše djelo (postignuća) veliko. Ostvarili smo naš milenijski san, samostalnost i suverenost zemlje. Naša djeca imaju svoju domovinu o čijoj ljepoti smo ranije govorili. Čak i hladno odbijanje koje smo doživjeli na samoj porti ovosvjetske haške pravde svjedoči tu suverenost naše zemlje. Ta hladnoća nas je zaboljela, ali nas ne smije obeshrabriti. Ništa nije završeno. Istina će neminovno izlaziti na vidjelo, i danas i sutra. Naša borba za državu, narod, istinu i pravdu nesmiije prestajati. Na stotine je mogućnosti da se drži svijest o zlu koje nam se dogodilo. Porodica, škola, sud, udruženja..., tu su da o tome svjedoče, ukazuju i optužuju.

To je naše pravo i naš zalag za slobodu i suverenost u budućnosti. Mi smo ga stekli i nećemo ga se odricati.

Naravno, ispružene ruke iskrenog pokajanja ćemo prihvatiti s obje naše ruke oprosta. I to je naše pravo i s iskrenom nadom čekamo taj dan kada ćemo ga moći i ostvariti. Neka ovo proljeće bude naš novi početak u našoj borbi za slobodu, čast i dostojanstvo. Neka nam bogatstvo prirode i ljepote naše domovine budu inspirativni da se s velikim elanom i privrženošću uhvatimo u koštac s nedaćama i nasrtajima na naše vrijednosti. Neka nam i u ovome proljeću živi naša svijest da je naša domovina blagodat kojoj smo se radovali i koju brižno i pažljivo, poput biljčice u rasadniku, čuvamo i njegujemo.

Neka nam Uzvišeni u tome pomogne. Amin.

TEMA BROJA

NASTAVAK PROJEKTA „DODATNOG INSTITUCIONALNOG ODGOJA I EDUKACIJE“

U cilju promoviranja potrebe cjeloživotnog institucionalnog odgoja i edukacije Medžlis IZ-e Tešanj je i u periodu januar – mart 2017. nastavio projekat „Dodatnog institucionalnog odgoja i edukacije“, izdvajamo:

1. Stručni seminari za imame

Stručne seminare imama u ovom periodu organizirali su Medžlis IZ-e Tešanj i Muftijstvo zeničko i to:

1. stručni seminar 24. 01. 2017. za imame Medžlisa IZ-e Tešanj, Doboj i Teslić održan u Kuvajtskoj džamiji u Matuzićima na temu. „Islamska etika i neoliberalizam“ koju je prezentirao dr. Mustafa ef. Cerić, bivši Reisu-l-ulema. Seminar je održan u organizaciji Muftijstva zeničkog u prisustvu muftije i glavnih imama.



4. stručni seminar – 23.02.2017. za imame Medžlisa IZ-e Tešanj, Doboj i Teslić održan u atriju Medžlisa IZ-e Tešanj na temu: „Semantička polja riječi džahilijet u Kur'anu“ koju je prezentirao dr. Almir ef. Fatić, profesor na FIN-a u Sarajevu. Seminar je održan u organizaciji Muftijstva zeničkog u prisustvu muftije i glavnih imama.



2. stručni seminar – 31.01.2017. održan u velikoj sali Medžlisa IZ-e Tešanj na kojoj je temu: „4. Islamski šart – vjerovanje u Božije poslanike,“ prezentirao Muris ef. Mahalbašić prof., imam džemata Oraš Planje.



5. stručni seminar – 23.02.2017. za imame Medžlisa IZ-e Tešanj, Doboj i Teslić održan u Tesliću. Temu: „Uvažavanje individualnih razlika u odgojnom radu imama“ prezentirao dr. Izet Pehlić.



3. stručni seminar – 14.02.2017. održan u velikoj sali Medžlisa IZ-e Tešanj. Temu: „Porodica“ prezentirao Ibrahim ef. Okanović prof., imam džemata Bukva.



7. stručni seminar – 28.03.2017. U Medžlisu Tešanj. Promocija knjige: „Utjecaj kira'eta na izvođenje šerijatskih propisa“. Promotori: muftija zenički doc. dr. Ejub Dautović, hafiz mr. Enes Beganović i autor hafiz dr. Safet Husejnović.



2. Takmičenje u učenju Kur'ana napamet

U okviru novog projekta IZ-e u BiH: „Saradnja sa nevladinim sektorom“, Medžlis IZ-e Tešanj je u saradnji sa UB „Vrijeme Zeman“, uz saglasnost Rijasetu IZ-e u BiH, a pod pokroviteljstvom porodice Mutayri iz Kuvajta, organizirao takmičenje u učenju Kur'ana napamet. Takmičenje je održano u tri kategorije sa učešćem takmičara iz cijele BiH.

Kvalifikaciono takmičenje je održano 10. 11. i 12. januara 2017. za sve tri kategorije odvojeno po kategorijama u tešanjskim džamijama, a finalno 14. januara 2017. godine na jednom mjestu (Centar za kulturu Tešanj).

U 1. Kategoriji – EL-BEQARE: 1. mjesto - Jusuf el Faharati, Sarajevo; 2. mjesto - Imran Spahić, Travnik; 3. mjesto - Bilal Hamidović, Sarajevo; 4. mjesto - Muhammed Ammar, Sarajevo; 5. mjesto - Velid Kalabić, Zenica; 6. mjesto – Muhamed Adilović, Travnik; 7. mjesto – Alen Mrakić, Travnik; 8. mjesto – Adnana Deari, Zvidovići; 9. mjesto – Merjem Hazić, Zenica i 10. mjesto – Asim Bilić, Zenica.

U 2. kategoriji – DŽUZ AMME: 1. mjesto – Zubejr Pezić, 2. mjesto – Merjem Beganović, 3. mjesto – Esma Sjerotanović, 4. Abdulah Salkanović, 5. mjesto – Jasir Pezić, 6. mjesto – Harun Omerović, 7. mjesto – Muhamed Selimović; 8. mjesto – Madžid Aganhodžić, 9. mjesto – Ensar Čičak i 10. mjesto – Ismail el Idrissi.

U 3. kategoriji – od EN-NAS do VED-DUHA: 1. mjesto - Mustafa Sinanović, 2. mjesto – Jusuf Šošić, 3. mjesto – Muhamed Salkanović, 4. mjesto – Elvedin Baltić, 5. mjesto – Hava Lepir, 6. mjesto – Nur Rustempašić, 7. mjesto – Ahmed Sjerotanović, 8. mjesto – Zehra Šehić, 9. mjesto – Muhamed Sarajlić i 10. mjesto – Ahmed Kruško.

Takmičari za osvojena prva četiri (4) mjesta u 1. kategoriji – El-Beqare dobili su nagradu – Odlazak na Umru, a ostalih šest po 500,00 KM.

Takmičari za osvojenih prvih deset (10) mjesta u 2. kategoriji – Amme džuz – dobili su nagradu po 300,00 KM.

Takmičari za osvojenih prvih deset (10) mjesta u 3. kategoriji – od En-Nas do Ved-Duha – dobili su nagradu po 200,00 KM.

3. Tribine – promocije – predavanja – halke Sufare i Kur'ana

Jablanica, tribina, 07. 01.2017. i uručene vakufname vakifima. Gost vaiz direktor Vakufske direkcije hafiz dr. Senaid Zaimović koji je i uručio vakufname vakifima.

Tribina, 25. 02.2017. Temu „Sličimo li Poslaniku a.s.“ prisutnim posjetiocima prezentirao hafiz Alija ef. Rahman prof.



Miljanovci Novi, 20.01.2017. uručene svjedodžbe o završenoj Sufari za 10 odraslih polaznica poslije jaciye-namaza i to: Hodžić Mirnesa, Jacić Merisa, Okić Čamila, Ismaili Emina, Kruško Emira, Pazara Mirnesa, Amira Mujkanović, Husibegović Mirsada, Klepić Fikreta, Brković Mersida. Svjedodžbe uručio Bersad ef. Kozlić.



Velika sala Medžlisa IZ-e Tešanj – za žene, 28.01.2017. - Promocija knjige „Moj put do hidžaba“ autorice Amine Tabaković Delalić na kojoj su o knjizi i hidžabu, pored autorice, govorile i hafiza Hidajeta Mahalbašić kao promotor i muallima Fatima Čeman kao moderator i koordinator projekta „Ženski aktivizam“. Promocija je upriličena u okviru obilježavanja „Svjetskog dana hidžaba“ 1. februara.



Promotori

25. 02. 2017. Trbina, temu „Biti roditelj nekad i sad“ predstavile Asmira Garić prof. Islamske vjeronauke i Fatima Čeman, muallima korodinator.

25. 03. 2017. Trbina, temu „Roditeljstvo i stilovi roditeljstva“ prezentirale mr.sci. Emina Turalić diplom psiholog i Fatima Čeman, muallima korodinator.

Tešanj, atrij Medžlisa, 16. 03.2017. promocija knjige „Čuvarkuća“ održana u okviru općinske mnifestacije „Tešanjsko proljeće 2017“. Učesnici: akademik Abdulah Sidran, novinar Goran Milić, Damir Uzunović, Adnan Rondić i autor Tarik Đodić.



Miljanovci, 29. 01. 2017. uručene svjedodžbe o završenoj Hatmi za 22 odrasla polaznika halke učenja Kur'ana u džamiji poslije jaciye-namaza i to: Omerbašić Aiša, Smajić Ramiza, Ahmić Mina, Omerbašić Zehra, Alić Envera, Alić Aida, Čeman Adisa, Ahmić Nađa, Ramić Alema, Lekić Ismeta, Husanović Hanifa, Alić Elma, Smajić Nermina, Sarač Hana, Omerbašić Hanka, Smajić Emina, Omerbašić Ajka, Omerbašić Meliha, Omerbašić Samira, Klepić Sabiha, Čeman Selma i Ahmić hadži Sulejmen. Svjedodžbe uručio glavni imam mr. Fuad ef. Omerbašić.



Dobropolje-Mekiš – 13.01.2017. Tribina „Jedinstvo muslimana“ gost predavač Ejub Jašić prof.

24.02.2017. Tribina, glavni imam Medžlisa IZ-e Tešanj.

24.03.2017. Tribina, gost predavač dr. Mustafa ef. Cerić, raniji reisu-l-ulema IZ-e u BiH.



Mračaj-Potočani, 10.01.2017.g. Tribina, gost hafiz Fadil ef. Bektaš, prof. u Elči Ibrahimpašinoj medresi u Travniku.
10.03.2017. Tribina, gost hafiz Mirnes ef. Spahić, profesor u Behram-begovoj medresi Tuzla.

Raduša, 26. 02.2017. Tribina, temu „Odnosi među muslimanima“ prezentirao Salih ef. Haušić prof. u GHM.


Miljanovci Novi – 25.03.2017. – uručene svjedodžbe o završenoj sufari za 6 novih odraslih polaznica i to: Fatima Hadžan, Jasmina Kruško, Dževada Kruško, Hanka Smajić, Zuhra Smajić i Nedžada Okić.

Sedmične tribine u gradu, u periodu do 31.03.2016. godine održavane u: Čarši-džamiji nedjeljom – iz Hadisa. Harman džamiji – srijedom – iz Povijesti islama. Dibekhana džamiji – četvrtkom – Tefsir Kur'ana. Hamzibegovoj džamiji – iz Ahlaka i Akaida. Kao i druge aktivnosti (halke učenje Sufare i Kur'ana....).

Održana 4. redovna sjednica Skupštine Medžlisa IZ-e Tešanj u Atriju Medžlisa 26.02.2017. Izdvajamo:

Održana 4. redovna sjednica Skupštine Medžlisa IZ-e Tešanj (u V sazivu) – 26. 02. 2016. u Atriju Medžlisa IZ-e Tešanj sa početkom u 9,00 sati kojoj je prisustvovao 57 zastupnika od 86 izabраниh, muftija zenički doc. dr. Ejub ef. Dautović, i glavni imami medžlisa sa područja muftijstva.

Sjednicu je sazvaio i istu otvorio predsjednik IO Zehrudin Kruško, nakon čega je, shodno odredbama Ustava IZ-e u BiH, izabrano radno predsjedništvo u sastavu: Mustafa ef. Balić, predsjedavajući, Hasan Dolamić član i Kasim Halilović, zapisničar.



Radno predsjedništvo i predsjednik IO

Na početku rada sjednice prisutnima se obratio predsjednik IO Zehrudin Kruško i obrazložio Izvještaj o radu IO za 2016. godinu, Opće smjernice za rad IO za 2017. godinu, Završni račun Medžlisa za 2016. godinu, te prijedlog Budžeta za 2017. godinu.



Obrazloženje Izvještaja predsjednika IO

Nakon čega se prisutnima obratio i glavni imam Medžlisa IZ-e Tešanj mr. Fuad ef. Omerbašić.



Na sjednici je bez primjedbi usvojen:

- Izvještaj o radu IO za 2016. godinu,
 - Opće smjernice za rad u 2017. godini,
- te data saglasnost na:
- Završni račun Medžlisa za 2016. godinu i
 - prijedlog Budžeta za 2017. godinu.

U svojstvu gosta prisutnima su se obratili i čestitali na Izvještaju i ostvarenim rezultatima Izet ef. Čamdžić, glavni imam Medžlisa IZ-e Zavidovići, i mr. Suad Huskić, sabornik i Općinski načelnik.

U toku rada sjednice prisutnima se obratio i muftija zenički doc. dr. Ejub ef. Dautović.



Doc. dr. Ejub ef. Dautović, muftija zenički,

U svečanom dijelu sjednice dodjeljene su pohvale za postignuti uspjeh u radu Medžlisa za 2016. godinu:



mr. Enver ef. Kurtiću, imamu Čarši-džmije,



Muradifu Bošnjaku, predsjedniku dž.o. Kalošević.

Ahmi Hrviću, blagajniku džemata Vukovo, koji je zbog bolesti bio odsutan pa je pohvalu preuzeo imam džemata Mirnes ef. Alić.

Priznanje Muftijstva zeničkog za doprinos u radu i afirmaciji Islamske zajednice, Muftija je uručio



Senaidu Prnjavorcu, predsjedniku dž.o. Dibekhana džamije



Prisutni gosti na sjednici Skupštine

Događaji, iz naših džemata...

Tešanj; 28.02.2017.g. Održana izvještajna sjednica OO Ilmije Tešanj, pod predsjedavanjem radnog predsjedništva: Suljo ef. Djedović prof., predsjednik, Mustafa ef. Balić prof., sekretar i Dževad ef. Hasanbašić blagajnik.



Na sjednici je usvojen Izvještaj o radu za 2016. godinu, završeni račun za 2016. godinu.

U svečanom dijelu sjednice uručene su hedije najzaslužnijim distributerima štampe: Raif ef. Hasak prof, imam džemata Mijanovci; Bersad ef. Kozlić prof., imam džemata Miljanovci Novi; Muris ef. Mahalbašić prof., imam džemata Oraš Planje; Elvedin ef. Aličić prof., imam džemata Lepenica i mr. Enver ef. Kurtić, imam džemata Čarši-džamije.

Za jubilarne godine rada u IZ-i uručene su hedije: Rami ef. Svrzi prof., imamu džemata Raduša za 10 i Rami Jašiću, konobaru u Kahvi za 20 godina rada u IZ. Na sjednici su uručene i prigodne novčane hedije penzionisanim imamima i udovima imama.



Ljetinić – 30.03.2017. Proučena dova i svečano ispraćen u penziju Hamzalija ef. Lekić nakon punih 39 godina službovanja u ovom džematu.



Tešanj; 21. 01.2017. Uručene stipendije maturantima medresa iz fonda „Hasan ef. Škapur“ u maloj sali Medžlisa IZ-e Tešanj i to:

r.b.	PREZIME I IME	DŽEMAT	MEDRESA
1.	Bajrić Vahidin	Šije	Visoko
2.	Skula Adem	Šije	Tuzla
3.	Husanović Lamija	Miljanovci	Tuzla
4.	Ćeman Aiša	Miljanovci	Cazin
5.	Halvadžić Sadžida	Kar. Kop. Oručje	Sarajevo
6.	Ljevaković Azra	Trepče	Tuzla
7.	Agić Amela	Dibekhana dž.	Tuzla
8.	Mujkanović Almir	Miljanovci Novi	Cazin
9.	Ibrahmkadić Ajla	Medakovo	Sarajevo
10.	Pelto Adnan	Mrkotić-Putešić	Travnik
11.	Mumonović Lejla	Lepenica	Sarajevo
12.	Ahmetlić Emina	Vukovo	Visoko
13.	Ahmetlić Fatima	Vukovo	Visoko
14.	Alkaz Alema	Medakovo	Visoko
15.	Zukanović Medin	Oraš Planje	Tuzla
16.	Botić Ines	Jelah	Tuzla
17.	Garić Muhamed	Piljužići	Tuzla
18.	Hafiz Mulić Anes	Dibekhana dž.	Tuzla
19.	Bošnjak Elma	Kalošević	Sarajevo

„Eco proljeće 2017.“ – 1. 17.03.2016. – Hutba,
2. 19. 03. 2017. - Eco čas i akcija u svim mektebima u kojoj su poloznici mektebske nastave izvršili čišćenje i uređenje harema džamija, trgova, mezarja, ulica, riječnih korita i drugih javnih površina. Akcija je provedena pod pokroviteljstvom Općine Tešanj u okviru općinske akcije čišćenja teritorija općine i akcije „Vakufljenje vremena“ koju na području BiH vodi Vakufska direkcija.



3. 6. stručni seminar za imame, 21.03.2017. Temu: „Zaštita okoliša“ prezentirao Adnan Lihčić dipl.ing. maš.



Medžlis – održana pormocija knjige „Sloboda vjere na radnom mjestu u SAD“ Emira Kovačevića – 24.03.2017. – Promotori: dr. Nedim Begović; Vanja Jovanović, paroh sarajevski; mr. Fuad ef. Omerbašić, glavni imam Medžlisa IZ-e Tešanj i autor.



POSJETILI SU NAS

Delegacija iz Turske 18.01.2017. predvođena pravnikom Vakufske direkcije Sarajevo preko koje je Medžlis IZ-e Tešanj aplicirao projekat za pomoć u finansiranju završetka radova na restauraciji Čarši-džamije i rekonstrukciji Kahve.



Podpredsjednik RS i ministar za izbjeglice F BiH – Ramiz Salić i Edin Ramić – 27.01.2017. u društvu Općinskog načelnika mr. Suada Huskića i pomoćnika Sabahudina Omerbašića posjetili i Medžlis IZ-e Tešanj gdje im je domaćin bio glavni imam.



Ambasador Malezije u BiH N.J.E. Anuar Kasman 17.02.2017. u pratnji Općinskog načelnika mr. Suada Huskića, posjetio Medžlis IZ-e Tešanj i u Čarši-džamiji klanjao džumu.



Khalid Osman – predstavnik kompanije Alqefary group – 23. 03. 2017. Dogovor o finansiranju izgradnje novog mesdžida u Koprivcima, (džemat Karadaglije - Koprivci – Oručje).



Medžlis Tešanj, 07.03.2017. – domaćin sastanka muftije zeničkog doc. dr. Ejub ef. Dautovića sa glavnim imamima i koordinatorima sa područja Muftijstva.



Televizija tuzlanskog kantona – 24. 03. 2017. g. snimljena reportaža o Medžlisu IZ-e Tešanj za ramazanski program ove TV kuće.

**POSJETILI SMO**

Muftijstvo zeničko – 07. 02. 2017. Prijem za glavne imame i imame magistre.



OŠ „Huso Hodžić“ - 02.03.2017. Čestitka novom direktoru i dogovor o nastavku saradnje.

